



# Upplýsingaöryggisstefna Kjósarhrepps

## Tilgangur

Samkvæmt lögum um persónuvernd og vinnslu persónuupplýsinga nr. 90/2018 ber Kjósarhreppi (hér eftir Kjósarhreppur eða „sveitarfélagið“) að tryggja viðunandi öryggi persónuupplýsinga. Upplýsingaöryggisstefna þessi lýsir áherslum sveitarfélagsins á mikilvægi þeirrar skyldu. Verja þarf persónuupplýsingar hjá sveitarfélaginu fyrir öllum ógnum, bæði innri og ytri, og gildir einu hvort þær ógnanir stafi af ásetningi eða gáleysi. Með þessari stefnu geta starfsmenn, íbúar og aðrir treyst ásetningi Kjósarhrepps til að standa vörð um öryggi persónuupplýsinga, m.t.t. til leyndar, réttleika og tiltækileika.

## Umfang

Upplýsingaöryggisstefna þessi nær til umgengni og vistunar allra persónuupplýsinga í vörslu Kjósarhrepps. Hún tekur til innri starfsemi sveitarfélagsins og þjónustu sem sveitarfélagið veitir íbúum sínum á samnýttum eða sértækum búnaði, auk allra innri kerfa, hug- og vélbúnaðar í eigu og undir fullri stjórn Kjósarhrepps. Jafnframt tekur hún til húsnæðis þar sem persónuupplýsingar eru meðhöndlaðar, starfsmanna og samningsbundinna aðila sem aðgang hafa að upplýsingunum.

## Markmið

Markmið Kjósarhrepps með upplýsingaöryggisstefnu þessari er að:

- Að persónuupplýsingar séu réttar og aðgengilegar þeim sem aðgangsheimild hafa.
- Að leynd persónuupplýsinga og trúnaði sé viðhaldið í samræmi við lög og reglur þar að lútandi.
- Að persónuupplýsingar séu varðar gegn skemmdum, eyðingu eða uppljóstrun, án tillits til þess hvort það komi til vegna ásetnings eða gáleysis.
- Að persónuupplýsingar sem fara um kerfi sveitarfélagsins komist til réttis viðtakanda, óskaddaðar og á réttum tíma.
- Að áhætta sem fylgir því að vinna með persónuupplýsingar sé innan skilgreindra áhættumarka.
- Að fylgja öllum lögum, reglugerðum og reglum sem varða meðferð persónuupplýsinga.
- Að fylgja öllum samningum sem sveitarfélagið er aðili að og varða vernd persónuupplýsinga.
- Að frávik, brot eða grunur um veikleika í upplýsingaöryggi séu tilkynnt og rannsökuð.
- Að unnið sé að stöðugum umbótum þegar kemur að upplýsingaöryggi.

## Leiðir að markmiði

Leiðir Kjósarhrepps að framangreindum markmiðum eru að:



- Halda skrár yfir upplýsingaeignir þar sem finna má persónuupplýsingar, hvort sem þær eru á rafrænu formi eða á pappír, og flokka þær eftir eðli og mikilvægi leyndar.
- Greina reglulega, með formlegu áhættumati, þá áhættu sem vinnsla persónuupplýsinga getur haft í för með sér fyrir einstaklinga.
- Stjórna áhættu vegna vinnslu persónuupplýsinga innan skilgreindra marka með því að starfrækja stjórnkerfi upplýsingaröryggis.
- Framkvæma mat á áhrifum á persónuvernd ef líklegt er að tiltekin tegund vinnslu geti haft í för með sér mikla áhættu fyrir frelsi og réttindi einstaklinga, svo sem þegar til stendur að taka ný kerfi í notkun sem hýsa eða vinna persónuupplýsingar að öðru leyti.
- Viðhalda gæðahandbók með verklagsreglum og verkferlum vegna vinnslu persónuupplýsinga.
- Allir starfsmenn Kjósarhrepps fái reglulega þjálfun og fræðslu varðandi öryggi persónuupplýsinga og um þá ábyrgð sem á þeim hvílir.
- Allir starfsmenn fylgi gildandi lögum og reglum.
- Tryggja að afrit af persónuupplýsingum sé til og varðveitt á öruggan hátt.

## Ábyrgð

- Hreppsnefnd sveitarfélagsins ber ábyrgð á þessari upplýsingaöryggisstefnu og endurskoðar hana reglulega.
- Oddviti/sveitarstjóri Kjósarhrepps er ábyrgur fyrir framkvæmd stefnunnar.
- Umsjónarmaður öryggismála sér um daglega stjórnun upplýsingaöryggis.
- Persónuverndarfulltrúi skal sjá til þess að starfsfólk hljóti viðeigandi fræðslu um öryggi persónuupplýsinga.
- Öllum starfsmönnum Kjósarhrepps ber að vinna samkvæmt upplýsingaöryggisstefnunni. Þeim ber að tilkynna öryggisfrávik og veikleika sem varða upplýsingaöryggi. Þeir sem ógna upplýsingaöryggi Kjósarhrepps af ásettu ráði eiga yfir höfði sér málshöfðun eða aðrar viðeigandi lagalegar aðferðir.

## Endurskoðun

Þessa stefnu skal endurskoða árlega og oftar ef þörf krefur til að tryggja að hún samrýmist markmiðum Kjósarhrepps.

## Samþykki

Samþykkt af hreppsnefnd Kjósarhrepps 08. október, 2020.